

四庫全書薈要

• 乾隆御覽本

史部

欽定四庫全書薈要

史部

十國春秋卷六十六

三至六

詳校官員外郎臣楊世綸



十國春秋卷六十三

檢討吳任臣撰

南漢六

列傳

蘇章

梁克貞

李守  
鄭

程寶

孫德威

蘇章以牙校事高祖積功至左右街使大有初楚人舉  
水軍侵封州章將神弩三千戰艦百艘往救既至賀江  
章沉鐵絙於水中為巨輪兩岸上築堤以隱之因輕舟

迎戰陽敗而奔楚人以為怯也逐之章舉巨輪挽絙鎖  
楚舟楚舟不得進退用强弩夾江射之楚人大敗解圍  
遁去高祖改章封州團練使章驍勇善戰而行軍多合  
古法遂為一時名將子五人俱為中郎將豪俠任氣當  
世號五郎將云

梁克貞與章同時用兵雖不盡善而勇略頗亞于章大  
有三年交州亂高祖命克貞征之俘其節度使曲承美  
已又入占城取寶貨而回由是南蠻大恐驚服兵威實



克貞力也時共事者為李守鄴功亦與克貞埒

程寶不知其所自起高祖時官承旨大有四年楊廷藝  
圍交州寶將兵往援未至而城已陷遂攻廷藝于交州  
寶竟以戰敗死

孫德威勇敢有氣力數從高祖征伐戰鬪常冠軍大有  
九年將兵侵楚蒙桂二州已而為楚文昭王所逼遂自  
蒙州引還後數年卒

論曰蘇梁李三將皆嶺表之虎臣也斬將搴旗章功為

最克貞守鄙次之若寶與德威或死或走雖未竟厥用而輿尸左次要豈盡戰之罪哉

王宏

梁嵩

王詡

張瀛

王宏

闕

人少穎異能工詩賦乾亨時由進士官翰林

學士承旨珥筆左右甚被親信會白虹化為白龍見三清殿宏為白虹化白龍賦上之文采鉅麗辭旨暢洽高祖悅改元白龍深加欣賞已又謨昭陽殿賦亦見稱于時

梁高潯州平南人白龍元年舉進士第一仕至翰林學士見時多虐政乞歸養母因獻倚門望子賦以見志高祖憐之聽其去錫賚皆却不受請蠲本州一歲丁賦從之及歿州人感德歲祀不絕或云嵩常乘白馬遊東壕墟過渡溺水死至今有白馬廟其遺蹟云

王詡

一作胡

南海人也及高祖改縣名遂為咸寧人乾亨

初舉進士拜中書舍人會白龍見南宮詡進白龍頌文采斐然大有七年昭陽殿成詡又著昭陽殿賦上之

其序

曰皇帝基構乾坤十有八歲矣甲午春始作茲殿云云詞多散失不錄

是時獻賦者數十百

人稱謂為第一每賜予稍緩謂必揚言曰吾賦字字作金聲何受賜之晚也其自負如此

張瀛

闕

人父碧雅有詩名瀛能世其學累官至

闕曹

郎嘗為長歌贈琴碁僧同列稱之曰非其父不生其子

何瑱

劉塘

何詞

李紆

鄭翺

何瑱仕高祖為左僕射有容觀姿貌饒文采大有初吳

越武肅王薨填承命致祭于吳越言論舉止大得嗣王  
心高祖深喜之

劉瑋軋亨時官客省使高祖既自立為帝命瑋聘于吳  
以即位告且勸吳王隆演稱皇帝未幾自江南歸復命  
不知所終

何詞累官至宮苑使唐莊宗滅梁高祖聞之懼遣詞覘  
中朝強弱稱大漢國主致書大唐皇帝頗講鈞禮不為  
屈詞還言唐主驕淫無政不足畏也行且亂矣惡能及

遠乎高祖自是不復通中國踰年莊宗被弑人皆多詞  
有先知之哲

李紆大有時為諫議大夫雅有風采文辭占對觀者傾  
竦會宰相趙光裔言楚本婚姻之國不可忘舊好且薦  
紆有才可將使命于是遣紆將命于楚楚文昭王見紆  
大喜深加款渥隨遣使報聘以復二國之好是役也睦  
鄰封續舊姻寧邊鄙弭敵兵謀出光裔而紆實有以成  
之

鄭翺

明

人累官至都官郎中大有中高祖與江南和好使問不絕是時南唐烈祖以誕生日為仁壽節遂遣翺銜命往賀逾年歸終于其職

論曰講信修睦以通鄰好端惟使臣是賴凡此諸臣皆翩翩皇華之選也康陵之時行李往來常勤聘問區區嶺外晏然小安夫亦藉行人力邪

侯融

蕭益

王翺

侯融

關

人事高祖官著作佐郎為人慷慨喜直言高

祖初年數窮兵黠武以征伐為事融因乘間勸其弭兵  
息民用安南土高祖稍稍從之已而交州之亂交王弘  
操死焉高祖以國兵不振實融去兵之言所致時融已  
死數年矣于是追究融剖棺以暴其尸

蕭益故唐相倣之孫也大有初累官崇文使時交州亂  
皎公羨與吳權相攻高祖欲乘其亂取之命子弘操為  
交王將兵救公羨益曰吳權桀黠誠未可輕今霖雨積  
旬海道險遠大軍當持重多用鄉導然後可進否則兵



未戢也高祖不聽弘操果敗死未幾高祖病革與右僕射王翽謀出秦晉二王于外而立第五子弘昌制命將行矣會益入問疾高祖告之故益諫曰立嫡以長違之必亂少者若立禍自此始由是殤帝卒得立

王翽大有末積官至右僕射兼西院御史高祖疾篤時以越王弘昌賢欲踰次立之謀于翽翽為高祖畫策謂當出秦王鎮邕州晉王鎮容州因立越王為太子此萬全計也秦王乃殤帝晉王即中宗是也已而蕭益力止

之事遂不行中宗時進左僕射乾和三年追翽廢長立少之罪出為英州刺史尋賜死于道

論曰論者謂越王有賢行而殤帝中宗皆淫暴主假王翽之計得行未必非國福然立嫡以長大居正之義也益之持議要不可易矣侯融力勸弭兵乾亨之際切中機宜固與蕭俛汰兵有殊焉橫遭斷棺其亦遇人不淑乎

蕭規

孫惠

滕紹英

萬景忻

蕭規未詳何郡縣人光天元年規奉殤帝命告哀于南唐後事闕

孫惠事高祖父子為法物使光天元年繼蕭規告即位于金陵大得使臣體時人稱其才

滕紹英

國

人時南唐烈祖仁壽節高祖輒遣使往賀

歲以為常殤帝嗣位擇使臣修故事朝臣咸薦紹英有專對才紹英遂將命以往

萬景忻少以驍勇為牙校大有時積功至指揮使殤帝

初立循州賊張遇賢作亂殤帝命越王弘昌循王弘杲  
征之師敗績二王困圍中不得出時景忻隸王戲下在  
行間與指揮使陳道庠扶持弓矢馳馬略陳力救二王  
得免應乾元年景忻復敗遇賢於循州遇賢遂踰嶺而  
北不復還循州之平景忻功為第一

十國春秋卷六十三

十國春秋卷六十四

檢討吳任臣撰

南漢七

列傳

陳偓

盧膺

鄧伸

李興

陳偓史失其世系歷官至戶部侍郎乾和二年知政事  
越王弘昌既遇害中宗于是擇相于朝臣遂以偓同平  
章事偓居職無所短長充位而已

盧膺仕高祖為工部侍郎大有中加太尉與謝宜清等  
出使吳越求聘錢傳璠之室為繼后無功而還膺才藻  
俊茂酷有體裁中宗時拜中書侍郎同平章事乾和十  
五年冬卒于官

鄧伸乾和時官至特進父璠與指揮使陳道庠舊友也  
道庠既引力士劉思潮等弑殤帝及思潮等伏誅道庠  
輒懷懼不自適伸以父友故遺以荀悅漢紀諷之道庠  
詰其由伸曰慙獠此書有誅韓信醢彭越事宜審讀之

中宗聞之族道庠并及伸

李璵事中宗為給事中乾和時交州吳昌文來稱臣中宗假以靜海節鎮兼安南都護令璵持旌節招焉昌文意中變璵方抵白州地遽使人止之曰海寇竊發道途阻塞璵遂還後數年卒

吳懷恩

吳恂

謝貫

吳懷恩番禺人也先天時官內常侍殤帝驕淫無度懷恩屢切諫不聽中宗即位懷恩進開府儀同三司乳和

中楚王希廣與庶兄爭國中宗以懷恩為西北面招討使將兵擊楚拔賀州已而復陷昭州未幾帥兵北征盡得蒙桂宜連梧巖富昭柳象龔十一州之地當時稱善戰者咸推懷恩為首同時復有吳恂謝貫

吳恂

一作珣

為將善出奇計乾和時歷官至巨象指揮使

既與吳懷恩共拔賀州楚人來救恂先鑿大窰於城下覆箔於上以土傳之楚將徐知新等逼城恂遣人自穴中發機楚人悉陷窰中死者無筭知新等遁歸恂侵桂



州境上掠全州以還

謝貫積功為將軍素有膽勇喜鏖戰取名一時乾和九年與潘崇徹攻郴州會唐兵來援敗其將邊錡于義章卒陷郴城由是嶺表土地益廣

論曰懷恩略地攻城勢同拉朽如熊如羆斯云無忝恂相機規畫神算無遺有將略焉貫負勇烈之名郴陽一戰耆定疆土要之昭陵奮武所嚮無前諸臣則其首庸矣

簡文會

鍾允章

簡文會南海人乾亨元年改南海為咸寧常康二縣遂為咸寧人文會幼穎異工詩性耿直高祖初開進士科擢第一人及第累官尚書右丞乾和時切諫中宗暴酷中宗大怒謫禎州刺史盡心民事卒于官所居里有簡

狀元井

明時倫文叙居其地亦狀元及第

鍾允章其先邕州人徙家番禺

一日宣化人

博學瞻文辭為

人侃直不畏強禦高祖時設科取士允章以進士及第

累遷至中書舍人尤為中宗所知凡詔勅碑記多命允章屬草允章文思敏捷操筆立就由是聲名籍甚常從遊羅浮山應制為詩動見褒賞拜工部郎中知制誥軋和中使楚求昏楚王希廣未之許也中宗怒問允章馬公復能經略南土乎是時楚恭孝王起兵武陵湖南大亂允章具言楚兄弟方爭可取狀中宗於是毅然發兵攻拔賀昭等州所至克捷實允章一言力也中宗嘉其功賞賚不可勝紀居頃之有司奏允章名儒宜傳儲貳

遂承命輔導後主已而中宗晏駕後主嗣皇帝位以允

章藩府舊僚頗加敬禮擢尚書左丞

一作右丞

參知政事允

章素疾宦官用事且性慙不善作隱語至是直請誅亂

法者數人以正綱紀後主不能從而宦官輩已人人切

齒矣大寶初會後主將祀園丘前三日允章與禮官登

壇四顧指麾設神位內侍監許彥真望見之以謂是可

誣允章而殺之也陽言曰此謀反耳乃拔劍升壇允章

迎叱彥真彥真即馳告允章反後主曰朕待允章厚豈

有此邪龔澄樞李托等共證以為然後主乃下允章獄遣宦官與禮部尚書薛用丕雜治之遂族誅允章是日天色慘淡國人以允章素忠鯁皆為掩涕及彥真被殺後始收塋焉自是宦官益橫而國亦因以亡允章詩文甚富乾和七年撰碧落洞天雲華御室記甚為文士所稱辭曰大漢享國之三十有三祀龍集己酉季冬寅開十四葉上以萬幾有暇四海無波時屬祈寒節當冬狩九卿扈駕百司隨鑾巡英州舍于閭石翼日排僊仗整

翠華羽衛星羅旗幢雲布嶽靈警蹕風伯清塵上衣龍  
章絳袍曳鳳文翠綬佩流黃鏤金之劍御靈飛凌崖之  
輿幸茲盤龍石室者也伏惟大聖文武玄德大明至道  
大廣孝皇帝陛下聖惟天縱功格帝堯味道探玄奉真  
元之化端拱垂衣返淳朴之風百度惟貞九圍承式因  
訪清虛之景爰追汗漫之遊斯山之勝槩也得非元化  
興機巨靈運智丹臺璿室真為上帝之居乳竇之房宛  
是長生之境白犬吠而壺天晝永幽禽語而洞壑雲深

神草含華玄泉瀉瑞於是拂石牀而設御停玉輦以凝  
旒遂感龜鶴呈祥河宗效器俄頃有一道流衣短褐歛  
容而至自稱野人本無姓名云昔時葛先生於此石室  
煉丹砂藥成息焰躡雲而舉令野人且伏火延神秘丹  
於靈府并云後五百載當有真人降此子宜以其還丹  
呈獻昨略筭之起重光單衣之歲迄屠維作噩之年將  
四百九十祀果令金德主來幸驗其君之言明矣野人  
因匍匐而來上喜聞所陳問僊者靈丹何在野人曰咫

尺耳遂捫蘿於峭壁中取出一小石函函上有金書古篆題九蛻之丹四字內有神丹七粒大如黍粟光影射人僊者開函取丹躬自持獻野人遽旋踵隱入石縫間罔知厥止時有近臣奏曰聖上德契玄微感茲靈異尚以兆民係念四海為心雖獲還丹未宜輕服上然所奏遂屏去左右廼召從臣吳懷恩捧丹隨御於石室深邃處鑿石秘之衆莫知矣擇日亟命道衆設壇場陳齋醮以申告謝靈貺由是龍顏開豁圓蓋舒情緩撫瑤琴弄



流泉之激越親灑宸翰奮睿思之縱橫奏九成之簫韶  
烟霞縹緲感百獸之率舞洞府誼闡羣后子來皆朝於  
禹會衆僊萃至競祝於堯齡微臣榮列紫垣獲隨鑾輅  
紀僊靈秘奧之事媿乏好辭頌聖朝煥赫之功慙無麗  
藻拜承綸旨伏積兢惶餘文多散佚不傳

論曰文會允章之起家也俱以文辭擢高第而鯁直性  
生侃侃不撓殆所云松柏之姿經霜彌茂與或則謫死  
外郡或則族及妻孥處衰亂之朝其能免于慘辱者鮮

矣

劉博古

曾芳

劉博古不知其家世。乾和中官潯州刺史。有惠政。民多愛之。博古常植橘于陸公井。傍潯人稱曰橘井。蓋誌其遺澤如此。

曾芳未詳何地人。故漢時有為廣州刺史者。芳其後也。

仕闕

為程鄉令。政清刑簡。以仁愛聞。時程鄉民苦瘡。

瘍。芳給藥以濟之。遠近求者日千百計。踵相接也。芳乃

以大囊盛藥置井中令病者汲飲皆霍然而起後人名

其井曰曾井立祠井傍邑人祀之者飲水愈疾如初

後宋

仁宗降詔追封芳為忠孝公又飛白書曾氏忠孝泉五字以旌之

謝傑

闕

時為高州刺史境多虎夜入郭中為暴人不

寧居傑一日沐浴詣城隍神舉酒祝曰愚民何辜而虎暴之此刺史無德化願虎但食刺史無傷愚民因屏去左右獨宿殿庭是夜漏三下廟東南隅忽有物吼聲如雷久乃止遲明視之數虎悉斃

十國春秋卷六十四

十國春秋卷六十五

檢討吳任臣撰

南漢八

列傳

暨彥贇

陸光圖

邵廷琄

暨彥贇不知其家世或云吳暨豔後也乾和時累官巨  
艦指揮使常以兵入海掠商人金帛為中宗離宮之費  
已而率兵戍郴州捍禦邊境頗以方略稱大寶七年宋

師南侵陷郴地彥贊死之

陸光圖四會人也祖東升為烈宗裨將守端州及高祖  
建國累遷兵部侍郎父昂桂州刺史領靜江軍節度使  
光圖生長華胄讀書知大義歷仕至閤門副使後主時  
文武百官多入知內侍省光圖獨堅求外郡後主惡其  
意遂出為郴州刺史至郴周恤窮民招輯兵士民皆呼  
為陸父宋師臨境光圖遣兵柵騎田嶺會雨漲黃溪溢  
宋將潘美順流破柵光圖同豎彥贊力戰敗績被執抗

罵不屈俱遇害其子孫多居端州光圖有故吏龐姓者  
失其名常奏事見後主後主雅識之及後主入宋過騎  
田嶺龐伏地迎後主驚曰爾何近在此邪對曰陛下之  
國邊境至此已極非有萬里之遠也先是後主意柳在  
窮荒北邊故徙光圖居之不知特逼處南隅耳其為昏  
駭如此

邵廷琄事後主官內常侍大寶初宋已易周祚廷琄乘  
間言于朝曰我國承唐亂居此五十餘年幸中國多故

干戈不及而我益驕於無事致兵不識旗鼓人主不知  
存亡夫天下亂久矣亂久而治自然之勢也比聞真主  
已出必將盡有海內其勢非一天下不已請飭兵備且  
遣使通好于宋

一云否則宜  
歛兵自守

後主惡廷琄言直深恨之

未幾宋將潘美等陷郴州始思廷琄言詔廷琄為招討  
使率舟兵屯洸口以拒宋師廷琄招輯亡叛訓士卒修  
戰具國人賴以少安有譖者投無名書誣廷琄將圖不  
軌後主遽遣使賜廷琄死士卒排軍門見使者訴廷琄



無反狀不能救乃相與立廟洗口祀之

南海古蹟記云東莞鎮象塔禹

餘宮使邵廷琄造禹餘宮漢離宮也廷琄官名更見于此

論曰當宋師南征昭州陷則靳暉被禽田行稠潛遁桂州破則李承進弃城走韶州潰則辛延渥卿文遠就縛其它二三守臣望風納款比比皆然若彥贊光圖之守郴也抗詈不屈慷慨殉難可不為烈哉至廷琄進謀于徙薪喪身于貝錦言之其臧則具是違言之不臧則具是依真後主之謂乎赫赫長城君自壞之嗚呼南漢之

亡亦何待素衣白馬日邪

潘崇徹

伍彥柔

盧枝

李承渥

郭崇岳

植廷曉

潘崇徹咸寧人初事高祖為內侍省局丞頗讀兵書立戰功乾和中取郴州有功中宗常命大將吳懷恩伐桂州平之已而懷恩召歸宿衛命崇徹代其任後主時加西北面都統歲餘後主頗疑崇徹遣薛崇譽使其軍以察之崇譽還白崇徹日以伶人八百餘衣錦繡吹玉笛

為長夜之飲不恤軍政後主怒召歸奪其兵柄自是居  
常怏怏宋師入境後主復召崇徹領兵五萬戍賀江崇  
徹不為效命擁衆自保而已未幾宋將潘美克英雄二  
州崇徹以其衆降宋太祖特赦其罪授汝州別駕卒

伍彥柔者史失其爵里世系大寶時宋將潘美圍賀州  
後主遣彥柔將兵援賀美聞彥柔至潛以奇兵伏南岸  
為三覆以待之彥柔未之知也夜泊南鄉艤舟岸側遲  
明挾彈登岸左右四顧自謂敵在目中矣踞牀指揮殊

有矜色頃之伏兵猝起水陸俱進彥柔軍大亂被殺

盧枝以大寶十三年為招討使將兵扼騎田嶺嶺號咽

喉地宋師來攻皆敗走會叛將李廷珙引兵出舂陵屯

平陽去枝屯百餘里聞枝堅壘相拒請于宋帥潘美曰

枝衆皆廷珙故部曲願輸忠久矣招之必下美許之乃

單騎招枝兵降枝兵稍稍解去遂退保清遠燒壘而遁

李承渥大寶中積功至大將宋師連破昭桂連賀諸州

後主署承渥為都統將兵十餘萬人屯韶州之蓮花峰

下嶺南兵常布象為陳凡出戰先令兵士操器械乘象前進每象輒載十數人以鼓士氣至是宋帥潘美集勁弩射象象不能當率奔蹏反走乘象者皆傾側墮地自相蹂躪軍遂大潰承渥得僅免

郭崇岳宮媼梁鸞真之養子也宋師破韶州後主用鸞真薦以崇岳為招討使與大將植廷曉帥軍屯馬逕以遏宋師崇岳素懦無謀勇惟日祈鬼神却敵廷曉謂崇岳曰北軍乘席捲之勢其鋒不可當吾士旅雖衆然皆

傷罷之餘今不驅策而前將坐受其斃矣乃自領前軍  
扼水以陳令崇岳殿後已而宋兵濟水逼城下後主欲  
命文武迎降崇岳固止之廷曉遂力戰不勝死崇岳亟  
奔還柵內宋將潘美謀篝火焚柵乃分遣丁夫人持二  
炬會暮夜天大風萬炬俱發烟埃紛起兵遂大敗崇岳  
亦死焉廷曉闕人洪武時興寧教諭植士謙正統時  
文昌知縣植謙皆其後裔也

論曰崇徹擁衆不戰志在懟君二心之臣也枝與彥柔

承渥斗宵之流未嫻武略假敵非潘帥其能免于轍亂  
旗靡乎崇岳志大器小興尸再辱非不幸也若延曉者  
抑所云鐵中之錚錚者與

鍾有章

薛用丕

王珪

黃德昭

鍾有章尚書左丞允章之弟也少有文學與允章齊名  
累官翰林學士中書舍人後主初嗣位建天華宮于羅  
浮山又立雲華閣及甘露羽蓋等亭命有章為之記辭  
采弘瞻雅稱作者居數月先允章卒未幾而允章之禍

作

薛用丕大寶初為禮部尚書與左丞鍾允章有舊好許  
彥真之告變也後主命宦者與用丕雜治允章用丕揣  
宦者意告以必不免允章執用丕手泣曰天乎冤哉老  
夫今日猶枕上肉耳分為仇人所烹但恨邕昌幼不知  
我冤俟其長公可為我告之邕昌者允章二子名也彥  
真聞之罵曰反賊欲使兒子報仇邪復入白後主允章  
實與二子共登壇潛有所禱并捕二子繫獄族誅之



王珪事後主為諫議大夫國亡後宋太祖遣使問宦官  
李托等率眾拒戰及縱火焚府庫事托默然不言珪直  
責之曰昔在廣州機務並爾輩所專火又自內起今天  
子遣使按問爾復欲推過何人遂唾而批其頰

黃德昭大寶末累官至學士從後主入宋路由江陵卽  
吏龐師進迎謁于道時德昭侍後主後主問師進何人  
德昭曰本國人也後主曰何為在此德昭曰先主歲貢  
大朝輜重比至荊州乃令進師至卽於此造車以給饋

運爾後主嘆曰我在位十四年未常聞此言今日始知  
祖宗山河及大朝境土也因泣涕久之

蕭淮

卓惟休

周茂元

馮元

李廷琪

周渭

唐承裕

駱崇璫

蕭淮歷官左僕射為人依違鮮所可否大寶十四年宋  
師度馬逕後主遣淮奉表詣軍門降宋將潘美宣太祖  
意先使人送淮至汴京已而授淮太子中允

李燾續長  
編作蕭淮

卓惟休大寶時官中書舍人宋師南征從後主入宋改

授太僕寺丞

周茂元者知司天監事傑之子也茂元生而穎異能繼父志世其學事高祖至司天少監及後主降宋茂元從之授監丞而卒子克明精歷律天官五行讖緯及三式風雲龜策之書隨父至宋開寶中授司天六壬改臺主簿轉監丞稍遷春官正

馮元字道宗其先始平人也四代祖官廣州以黃巢之亂不敢歸而烈宗據南海僑斷士人故三世居嶺南為

日御大寶末元父子從後主朝宋元父某授保章正元  
由大中祥符元年進士累官翰林侍讀遷戶部侍郎卒  
年六十三謚曰章靖事具宋史不具錄

李廷珙連州人父處顏博學善屬文事後唐明宗累功  
為武安節度莫府掌文翰處顏歿廷珙猶在襁褓寄食  
母家幼岐嶷不羣其舅器之曰此千里駒也乾和中除  
番禺簿後主初立擢士軍知兵馬使是時屠戮忠良廷  
珙知其必亡大寶九年四月降宋授郴州指揮使檢校

工部尚書兼御史大夫春州刺史明年獻平嶺表策及  
潘美南侵廷珙為宋師嚮導擢廣西總管招討使後論  
功宋太祖改所居為奉化里累遷刑部尚書

周渭恭城人也大寶時苦于繁賦因率鄉人踰嶺將避  
地零陵中道為賊所掠竄身走汴京上書宋太祖陳時  
務太祖奇之擢贊善大夫嶺南平渭始還鄉里奏去後  
主無藝之征鄉人德之為立祠

唐承裕世為

闕

人自中原之亂避地德昌縣

即桂州全義縣

後改名

大寶十四年國亡承裕入宋為顯官今其地猶傳

唐家宅

駱崇琛仕後主為

闕

有能名宋既平嶺南命周仁浚

知瓊州既至擇崇琛等四人列上分知儋崖振萬安四州因其俗而治之綽有政績時以為得人

胡萬頃

林楚材

胡萬頃

闕

人幼神悟精九宮三元之法占事多奇驗

撰六壬軍鑒式三卷太乙時紀陰陽二邇立成歷二卷

術數家多宗之

林楚材故番禺布衣也不測其為何人大寶末有稻田  
自海中浮來上魚藻門外民聚觀之楚材見而嘆曰水  
魚湫湫兮南時好事或有記其語者及宋師至潘美為  
都部署方悟為潘字

陳志女

莫荃

譚氏二女

牢氏

陳氏潁州人父志年八十惟依一女及志卒氏哀毀不  
自得未幾亦死鄉人以其死孝搏像于龍華寺祀之禱

雨輒驗烈宗封為昌福夫人

莫荃周渭之妻也渭出奔時不暇與荃訣二子方在孩抱間父母欲嫁之荃泣誓曰渭必能自奮荃有二心者有如皎日于是躬親蠶績碓舂以給朝夕久之為二子娶婦凡二十六年而渭歸

譚氏二女昭州人大寶初於誕山下修黃老術不知所之一日同里以不雨為憂二女至謂里翁曰汝能餉我即可得雨翁弟餉之未信也二女甫去果大雨如注翁



追覓不復見山下呼則上應山上呼則下應循至一巨石四周無草木二女之衣帶在焉是後恒見二女於石上擲髮因立廟祀之

牢氏尚書左丞鍾允章妻也有賢行允章號名臣而性吝嗇歲獲賜賚甚厚未嘗分遺故人牢乘間語允章曰妾昔事君子家無釜鬲止用一鉞猶且欸接賓友今寶貨盈室而義路榛塞即富貴何足尚也乃出鉞以示允章允章大慙自是稍稍揮散矣

十國春秋卷六十五

十國春秋卷六十六

檢討吳任臣撰

南漢九

列傳

林延遇

龔澄樞

許彥真

陳延壽

李托

薛崇譽

林延遇閩清人為人陰險多計數少以宦者給事閩惠宗惠宗娶高祖女清遠公主使延遇置邸於番禺專掌

國信高祖賜以大第稟賜甚厚數問以閩事延遇不對  
退謂人曰去閩語閩去越語越處人宮禁可如是乎高  
祖聞而賢之以為內常侍使鈞校諸司事已聞閩惠宗  
被弑求歸不許素服向本國三日哭中宗時為甘泉宮  
使大加倚任誅滅諸弟延遇實與其事軋和十四年病  
卒粵人方舉國相賀而龔澄樞繼延遇用事

龔澄樞廣州南海人也軋亨初分南海為咸寧常康二  
縣是為咸寧人性廉謹不妄交遊幼事高祖為內供奉

官累遷內給事無所顯名中宗襲位甘泉宮使林延遇  
頗預政事及病將死言于中宗曰臣死惟冀澄樞可用  
即日擢知承宣院兼內侍省已改德陵使兼龍德宮使  
進玉清宮使後主嗣立謂羣臣多自有家室顧子孫惟  
宦者親近足任遂委其政于澄樞革加澄樞特進開府  
儀同三司萬華宮使驃騎大將軍改上將軍左龍虎軍  
觀軍容使內太師軍國之務一出於澄樞澄樞與陳延  
壽引女里樊胡子內外作奸凡大小事多諮決以行胡

子又數為後主言澄樞等乃上天使來輔天子有罪不

可問澄樞因與李托薛崇譽置酷法之具以震警國中

民甚苦之宋師入境澄樞謀于托曰北師來利吾國寶

貨爾燬為空城師不能駐當自還也由是縱火焚府庫

宮殿殆盡宋將潘美至執澄樞頌繫龍德宮中已而送

汴京斬于千秋門外初高祖改名龔有僧人以識書進

言不利

宋史又云有術者言不利名龔

遂改名龔至後主用澄樞卒以

其姓亡國識者以為有先兆

許彥真仕中宗父子為內侍監既讒殺尚書左丞鍾允  
章與龔澄樞用事國中久之爭權不協會有告彥真通  
先朝李麗姬者澄樞將按其事彥真懼與其子謀殺澄  
樞澄樞使人告彥真謀反下獄族誅

續通鑑長編云澄  
樞遣西班將軍王

仁遇告彥

真父子反

陳延壽未詳其家世以宦官事後主與龔澄樞輩朋比  
弄法作諸淫巧日費數萬金以蠱惑後主心桂王璇興  
之死實自延壽從史之先是高祖雖寵任中官其數裁

三百餘位不過掖庭諸局令丞而已中宗時益廣至千  
餘人略增內常侍謁者之稱逮後主信任宦者凡羣臣  
有才能及進士狀頭或僧道可與談者皆先下蠶室然  
後得進亦有自宮以求用者亦有免死而宮者由是奄  
人漸十倍于乾和時通鑑綱目云宦者近二萬人諸使名不翅二百  
有三師三公等官稍加內字以別之因謂士人為門外  
人卒以此亡國

李托封州封川人少習騎射以謹愿事高祖為內府局



令中宗襲位遷內侍省內侍充宮闈諸衛押番兼秀華宮使後主立改玩華宮使內侍監兼列聖景陽二宮使托納二養女於後主長為貴妃次為美人政事皆訪托而後行加特進開府儀同三司甘泉宮使兼六軍觀軍容使行內中尉遷驃騎上將軍內太師宋師既陷韶州統軍使李承渥敗死節度副使辛延渥間道遣使勸後主納款托堅沮其議及就擒至許田宋太祖馳使問托等昨已約降復率衆來拒戰及軍敗又縱火燔府庫誰

為之謀者托俛首不能對諫議大夫王珪復詰責之托  
乃引伏後至汴京被戮

薛崇譽韶州曲江人善孫子五曹筭中宗署為內門使  
兼太倉使後主嗣位遷內中尉特進開府儀同三司簽  
書點檢司事宋師陷興王府崇譽舉火焚倉廩擒送汴  
京與李托等駢斬

論曰自古禍人國者惟宦官為甚其結主也以善柔而  
情常昵于不可解其毒人也以陰驚而患每發于有所

忽粵漢及唐其較著者也劉氏自乾和以後奄寺至七  
千餘人而舞法擅政者若延遇之陰狡善謀登樞之陰  
詐亂國彥真之殘忍妬賢延壽之淫巧惑上托則納女  
以操國柄崇譽則握美以竊主權議出多門內外朋比  
君既不恤國亦隨之雖昔伊戾禍宋豈刁亂齊未有若  
此之烈也要其所從來漸矣嗚呼知此可以論世云

余延業

趙純節

余延業

宋鑑作韓延業今從  
東都事略及宋史

大寶中為內常侍宋師陷

郴州獲後主內品十餘人延業其一也及至汴太祖問

延業若在嶺南何官延業對曰臣不才備扈駕弓箭之職太祖令取弓矢授之延業極力控弦不能開太祖因笑問後主為政之迹延業具言後主作燒煮剝剔刀山劍樹之刑令有罪者搏象擊虎以為笑樂又置媚川都入海採珠所居宮殿輒以明珠玳瑁飾之瓊州米計斗定稅五錢邕州民入城者輸錢一文內官陳延壽作奇技淫巧日費金錢鉅萬宮城左右離宮數十遊幸無虛

日率以豪民為課戶供宴犒費太祖大驚曰吾當救此  
一方民時方謀下蜀未遑也而嶺南之師延業實有以  
啓之

趙純節大寶時官內侍監稱貴璫雅與龔澄樞陳延壽  
同事而絕不侵攬朝政性情淡遠酷喜芭蕉樹凡軒窗  
館宇咸植之時號純節為焦迷

張遇賢

張遇賢禎州博羅縣小吏也縣之刻杉鎮有神降于民家

所言禍福輒驗遇賢往禱之因留奉事甚謹會羣盜大起莫相統一共祈于神神大言曰張遇賢是第十六羅漢當為汝主於是共推遇賢為中天八國王攻陷循州改元永樂署置百官皆衣絳衣遇賢年少無它方略賊帥各以便宜剽掠州縣告其進退而已殤帝遣越王弘昌循王弘杲討之戰不利為遇賢圍于錢帛館裨將萬景忻陳道庠力戰挾二王潰圍而走時光天元年也未幾遇賢屢為州兵所窘復告于神神曰可過嶺取虔州

當成大事遇賢遂襲南康唐百勝軍節度使賈浩始輕  
之不為備已而連陷諸州縣浩戒嚴守城遇賢據白雲  
洞造宮室營署命他盜四出攻劫久之唐通事中書舍  
人邊鎬洪州屯營都虞候嚴思一作嚴帥師出援遇賢

思禮

遂大敗復告于神神不復語因棄營遁賊將李台知

其無神也執遇賢及其副黃伯雄謀主僧景全送唐並  
斬建康市

論曰吳大帝時羅陽有人自稱王表言語飲食略與人

同而不見其形及觀遇賢之事何相類也要之盛世其鬼不靈而衰季神異雜見英略如吳主猶未免有感況盜賊輩乎明此可悟宣尼不語之旨矣

陳道庠

陳道庠端州人也殤帝時官指揮使錢帛館之役援二王有功由是日加親密中宗為晉王時道庠常蒙非望陰布腹心遂承指引力士劉思潮五人弑殤帝于寢門已而思潮等被殺道庠內不自安特進鄧仲與之善私



遺以漢紀語詳伸本傳中宗聞其事即族道庠家

廣南僧

僧如敏

僧文偃

僧子祥

廣南僧失其名烈宗出獵左右報大王來請起僧曰非但大王來佛來亦不起烈宗問佛豈不是汝師僧曰是烈宗曰見師為何不起對曰未足酬恩

一曰法眼代云

僧如敏福州人住韶州靈樹山烈宗高祖累加欽重署為知聖大師或問佛法至理若何敏展手而已又問年多少答曰今日生來朝死居嶺表四十餘年頗有異迹

高祖初立有事于師旅將詣院決臧否如敏已先知恬然坐逝及高祖至驚問何時得疾對曰師無疾適授一緘令呈大王開函得一帖子云人天眼目堂中上座高祖悟其意遂寢兵乃召第一座登堂說法即雲門文偃也賜如敏號曰靈樹禪師

僧文偃嘉興人姓張氏幼依空王寺志澄律師出家敏質生知慧辨天縱最後抵靈樹叅如敏禪師初如敏住山二十年不立首座一日令擊鐘三門外速延首座及

衆僧出迓則文偃來也後繼如敏開堂高祖親臨請益  
文偃曰目前無異路高祖大加欣賞文偃倡道靈樹雲  
門凡三十年機緣語句實立雲門宗之始以中宗乾和  
七年四月十日卒塔全身于方丈後十七載示夢阮紹  
莊曰與吾寄語秀華宮使特進李托奏請開塔于是後  
主勅迎內廷供養逾月方還因改寺曰大覺謚大慈雲  
匡真弘明禪師

僧子祥字性實文偃之法嗣也居韶州白雲山大闡雲

門宗乘初住慈光院中宗召入問祖意教意是同是別  
子祥應對稱旨及將示滅白衆曰去此即它方相見言  
訖而逝又韶州有章禪師者中宗問如何是禪良久不  
置對中宗莫測其旨因署號曰禪想亦文偃弟子

黃步松

黃勵

甘佃

莫公

黃步松隱身不仕常修煉山中遇僊人點悟丹成羽化  
而去後人名其所居曰遇僊洞或云乾和初中宗所遇  
道流即步松也


黃勵大有末官禎州刺史時高祖遙刑峻法勵棄官入  
羅浮山築書院于水簾洞左居焉久之聞雲華野人之  
名亦自號曰黃野人嘗逢僊真指授丹法修煉得道時  
時服黃衣繫皂條腰懸玉瓢遇病者投以藥輒効

宋高宗時

勵猶存紹興中封真達先生○大觀中有魚肉道人者  
兩手拳縮而唇過異人以藥一粒納口中遂能言語動  
作知隱匿事完日遇武當孫坦先生曰羅浮山黃野人  
五代時弃官學道宜往謁之道人至羅浮綠藤上崖見  
野人踞坐拜而拱立野人曰子可教  
取魚肉與之道人自此能食生肉

甘田象州人家素富四方告匱者隨探囊中金乞之滿

所欲而去性特靈異人有決禍福者無不奇中一日聚鄰里告曰吾已厭世矣因教衆以修身事親大節言訖瞑目而逝鄉人肖形祠之號曰甘大將

 公失其名別號爽朗道人家居昭州之富川縣七歲入石巖中跏趺靜坐開其所為居人相率伺


巖外一夕俄不見皆以為神舉去云

十國春秋卷六十六

總校官庶吉士臣張能照

校對官檢討臣郭寅

謄錄監生臣劉書



欽定四庫全書薈要

史部

十國春秋卷六十九

七至

詳校官員外郎臣楊世綸





十國春秋卷六十七

檢討吳任臣撰

楚一

武穆王世家

武穆王

林崇禧廟碑作武威王今從五代史十國世家

姓馬名殷字霸圖許州

鄆陵人也

三楚新錄云殷上蔡人通鑑云扶溝人

自云伏波之後唐中和

時忠武決勝指揮使孫儒與龍驤指揮使劉建鋒

或作峯非

新唐書云建鋒字銳端蔡州朗山人為忠武軍部將

戍蔡州拒黃巢殷隸軍中以

勇聞及秦宗權叛儒等皆從焉宗權乃遣儒建鋒將兵萬人屬其弟宗衡畧地淮南而殷實在行間時宗衡方攻楊行密于揚州未克會汴兵急攻宗權宗權召儒等儒不欲還宗衡屢趣之儒怒殺宗衡自將其兵取高郵遂逐行密行密據宣州儒以兵圍之久不下遣殷與建鋒掠食旁縣儒戰敗死殷等無所歸乃收餘衆七千人推建鋒為帥殷為先鋒指揮使以行軍司馬張佖為謀主轉攻豫章略虔吉遂有衆十餘萬乾寧元年入湖南

次醴陵武安節度使鄧處訥發邵州兵守龍回關建鋒

等至降其將蔣勛建鋒取勛鎧甲被先鋒兵張其旗幟

直趣潭州至東門東門守者以為闕兵戍還開門內之

建鋒徑入府處訥方宴擒斬之自稱留後明年僖宗授

建鋒檢校尚書左僕射武安軍節度使殷為內外馬步

都指揮使

通鑑載此事在乾寧二年四月戊戌

蔣勛求為邵州刺史建鋒

不與勛率兵攻湘鄉建鋒遣殷擊勛于邵州建鋒庸人

不能帥其下既得志即嗜酒不事事常與部曲等狎飲

謹呼軍卒陳贍妻有色

一云新息小史陳贍為建鋒御者

建鋒私之贍

怒袖鐵槌擊殺建鋒斷其喉

北夢瑣言云湖南節度使劉建封強其牽輓官陳某

之婦陳為同列所戲耻伺便以簇纂擊殺之馬氏有其位于今禁簇纂今從歐陽史

軍中推張佖

為帥佖將入府馬忽踶齧傷左髀是時殷攻邵州未歸

佖謝諸將曰馬公勇而有謀寬厚樂善吾所不及真乃

主也諸將乃共殺贍磔其尸遣姚彥章迎殷邵州

三楚新錄

云殷處卒伍隨渠帥何氏南侵長沙據之殷戰頻有功何乃推為裨將命為邵州刺史殷寬厚大度得士死力何氏卒諸將在外者皆擁兵歸以爭其位惟殷素服發長識者謂之知禮未幾寒軍各散其帥使人迎殷為主

其說無稽  
今不從

方值夜殷猶豫未行比曉忽睹一人黑色執

大棒趣報曰軍國內外平安俄而不見殷以為嘉兆語  
所親曰此行未必不為福因使親從都副指揮使李瓊  
留攻邵州徑詣潭州既至偕肩輿入府坐受殷拜謁已  
乃命殷升聽事以留後讓之即趣下帥將吏拜賀蓋軋  
寧三年五月也秋九月唐授殷潭州刺史判湖南軍府  
事光化元年三月命殷知武安留後未幾進本軍節度  
使時湖南管内七州賊帥楊思遠據衡州唐世旻據永

州蔡結據道州陳彥謙據郴州魯景仁據連州

路振九國志曰

唐是蔡結皆以郡人聚兵據郡陳彥謙桂陽人殺刺史

黃岳據郴州魯景仁本從黃巢以病留連州遂據之

殷所得惟潭邵二州而已

邵州為將勦所據是年二月張佖克邵州禽勦

五月

姚彥章請取衡永道連郴五州殷以李瓊秦彥暉為嶺

北七州遊奕使張圖英李唐副之將兵攻衡州斬師遠

引兵趣永州圍之月餘世旻走死即以李唐為刺史二

年遣唐攻道州蔡結聚群蠻伏兵于隘以邀之大破我

兵唐曰蠻所恃者山林耳若戰平地安能貶我乃命因

風燔林光燭天地蠻兵驚遁遂拔道州斬結十一月復遣李瓊攻郴州取陳彥謙誅之進攻連州魯景仁自殺湖南悉平三年冬十月靜江節度使劉士政聞殷盡收嶺北頗內懼命副使陳可璠率兵戍全義嶺殷遣使聘于士政使者至境上可璠不納殷怒令彥暉瓊等將兵七千攻之兵至全義士政又遣指揮使王建武屯秦城以為聲援會可璠掠民耕牛犒軍民怨之請為我兵鄉導言西南有小徑僅通單騎距秦城裁五十里耳于是

彥暉遣瓊以六十騎從步兵三百人由小徑襲秦城中

宵踰垣入擒建武紆之以練直造可璠壁示之可璠未

之信即斬其首投壁中桂人震恐瓊因勒兵大擊執可

璠等及其兵二十餘人殲焉秦城以南二十餘壁望風

奔潰遂圍桂管降士政

凡國志楚世家云光化二年殷克桂州非是

盡取其

所屬桂宜嚴柳象五州殷以瓊為桂州刺史未幾表授

桂管觀察使

通鑑作靜江節度使今從楚世家

天復二年春三月唐帝

使李儼宣諭江淮加殷同平章事三年夏四月吳王行



密遣使來言梁王全忠跋扈請絕之大將許德勳曰全忠雖不道然挾天子以令諸侯未可輕絕五月荆南節度使成汭赴援鄂州殷假救杜洪之名遣德勳將舟師

同澧朗兵承虛襲江陵庚戌陷之大掠而回

十國紀年云成汭救

杜洪未至鄂渚江陵已陷將士念其家皆無聞志士子洎賊死北夢瑣言云湖南及朗州軍入江陵俘載軍人百姓職掌伎巧僧道伶官並歸長沙道經岳州刺史鄧進忠具牛酒犒師

以城歸附

按九國志楚世家天祐二年七月岳州刺史鄧進忠帥其衆來降又許德勳傳云天祐二

年領兵略地荆南還經岳州刺史鄧進忠以城歸附然天祐二年十月朱全忠謀討襄州趙匡凝九月克襄州

始命楊師厚攻荆南則七月許德勲何田略地荆南九  
國志之誤明矣惟馬氏行年記曰天復三年自荆南振  
旅還遂入岳州降刺史鄧進忠此所謂荆南者乃成汭  
也其說為允至湖湘故事言開平中收荆南回進忠以  
城降

亦非殷以德勲為岳州刺史改進忠為衡州刺史天祐

元年淮南遣殷弟賓歸長沙殷表賓為武安軍節度副  
使二年我兵侵淮南為淮南牙內指揮使楊彪所敗三  
年春三月淮南將陳知新陷岳州七月吉州刺史彭玕  
來降明年梁王全忠改名晃即皇帝位改元殷遣使修  
貢且有勸進功夏四月辛未梁太祖拜殷侍中兼中書

令封楚王

開平元年五月梁勅改桂州純化縣曰歸化是月弘農王渥以鄂岳觀察使劉存為西南面都招討使岳州刺史陳知新為岳州團練使廬州觀察使劉威為應援使別將許立應為監軍統水兵三萬入寇王有懼色靜江軍使楊定真賀曰我軍勝矣臨敵而懼必勝之道也王命在城都指揮使秦彥暉將兵拒上流水軍副指揮使黃璠以舟三百伏瀏陽口六月存等遇大雨引兵還越

堤屢戰不勝乃遺我書詐降王欲許之彥暉以為不可  
信急擊之存等退走璠以瀏陽舟截江合擊大破之擒  
存與知新淮南兵死者無筭獲戰艦八百艘威以餘衆  
遁去彥暉遂取岳州王釋存知新之縛慰諭良久二人  
罵曰丈夫以死報主肯事賊乎王趣斬之是月王遣兵  
會吉州刺史彭玕攻洪州不克梁武貞節度使雷彥恭  
會我兵攻江陵荆南節度使高季昌預屯兵公安絕彥  
恭糧道彥恭敗走我兵亦遁秋七月彥恭襲我岳州以

有備而反八月辛亥梁加王兼武昌軍節度使克本道  
招討制置使九月丙申梁削雷彥恭官爵命王與高季  
昌討之以彥恭焚掠荆湖又附淮南也冬十月遣秦彥  
暉與荆南將倪可福攻朗州彥恭乞降于淮南淮南命  
將冷業屯昌江李饒屯瀏陽以援之王遣岳州刺史許  
德勲拒其師未幾執業于鹿角鎮執饒于瀏陽寨而歸  
斬之市中是年淮南將呂師周來奔

開平二年夏五月靜江節度使同平章事李瓊卒王以

弟永州刺史存知桂州事乙亥遣兵攻鄂州為淮南將  
秦裴所敗是月秦彥暉克朗州雷彥恭奔廣陵鹵其弟  
彥雄等七人送于梁奏改武貞軍為永順軍澧州刺史  
向環來降環與彥恭相表裏至是納款我始得澧朗二  
州之地六月判官高郁請聽民售茶北客收其征以贍  
軍從之秋七月王奏梁於汴荆襄唐郢復諸州置回圖  
務運茶河之南北以易繒纈戰馬仍歲貢茶二十五萬  
斤梁主詔曰可由是屬門民皆得摘山收茗募募戶置

邸閣以居茗號曰八牀主人歲筭數十萬國用遂足九月荆南兵屯漢口絕我朝貢之路王遣許德勲擊之兵至沙頭荆南求成又遣步軍都指揮使呂師周伐嶺南與清海節度使劉隱十餘戰取其昭賀梧州蒙龔富六州王土地既廣息民禮士湖南遂安

開平三年夏六月危全諷自稱鎮南節度使攻洪州時淮南將劉威守其地全諷請兵于我王遣指揮使苑玫會袁州刺史彭彥章

玠之兄也

圍高安以助全諷秋七月苑

攻與淮南將米志誠呂師造等戰于上高我師敗績吉  
州刺史彭玕來奔王表玕為郴州刺史且為子希範娶  
其女

開平四年夏六月王表求天策上將

歐陽史楚世家云  
殷乃請依唐太宗

故事開天冊府置  
官屬今從通鑑

梁加王天策上將軍王始開天策府

以弟竇為左相存為右相

歐史云殷以廖光國等十八  
人為學士又云希範開府承

制如殷故事文士廖光國等十八人皆故殷  
時學士今依通鑑以十八人之數屬希範

是月侵荆

南敗于油口吳水軍指揮使教駢圍彭城于赤石遣兵



擊駢以救城已而鹵駢歸冬十二月辰州蠻宋鄴寇湘鄉  
州兵五千討之

先是宋鄴破郴州潘金盛恃其所居深險數為邊擾至是俱入寇

寧遠

節度使龐巨昭以容州高州防禦使劉昌魯以高州內

附王命姚彥章張可求

湘湖近事作可求

將兵迎之隨以彥章

權知容州事昌魯為永順節度副使

乾化元年春正月呂師周入飛山洞襲潘金盛擒送武岡斬之移兵擊宋鄴冬十二月乙卯梁以王弟朗州留

後賓為永順軍節度使同平章事清海節度使劉巖攻

梁韶州陷之刺史廖興來奔王表興為永州刺史癸亥

梁勅靜江行軍司馬姚彥章為寧遠節度副使權知容

州從王請也未幾劉巖發兵寇容州王命都指揮使許

德勲以桂州兵救之彥章不能守巖遂取我容州又取

高州是時開冶鑄天策錢文曰天策府寶銅質渾厚徑

寸七分重三十銖二參

董道錢譜曰馬殷據湘南八州  
地建天策府因鑄天策府寶

乾化二年春二月辰州蠻宋鄴淑州蠻昌師益帥衆降

王以鄴為辰州刺史師益為淑州刺史夏四月癸丑梁  
以王為武安武昌靜江寧遠等軍節度使洪鄂四面行  
營都統甲戌梁主聞我與嶺南相攻命右散騎常侍韋  
戩等為潭廣和叶使六月梁郢王友珪弑其主晃而自  
立冬十一月吳將陳瑋襲岳州執我刺史苑玫王遣水  
軍都指揮使楊定真救之瑋復進攻荆南吳恐我師往  
救遣劉信帥江撫袁吉信五州兵屯吉州為瑋聲援  
乾化三年春正月吳陳瑋兵還我兵會荆南兵于江口

邀之瑋駢艘夜過追之不及三月梁均王友貞討賊友  
珪伏誅友貞立于大梁更名瑄秋八月姚彥章侵吳鄂  
州六以池州團練使呂師造為水陸行營應援使未至  
而我兵解還冬十月南平王劉巖求昏許之

乾化四年夏四月吳袁州刺史劉崇景舉州來附許貞  
以師援之吳將柴再用米志誠帥師討之是月岳州都  
指揮使王環襲吳黃州執其刺史馬鄴五月吳柴再用  
等破劉崇景于萬勝岡崇景遁去許貞師敗歸復失袁

州

貞明元年秋八月南平王巖來逆婦王遣弟永順節度使存送女于廣南冬十一月梁改元是歲梁主改名瑱

冊府元

龜作項

貞明二年冬十二月通好于晉晉亦遣使來聘

貞明三年

闕

月王遣弟存攻吳上高俘獲而還

貞明四年秋八月吳軍攻虔州防禦使譚全播來乞師王命張可求將萬人救之吳劉信遣其將張宣夜帥兵

三千襲張可求于古亭我師敗績是月梅山蠻寇邵州  
守將樊須擊走之

貞明五年夏五月王遣兵攻荆南荆南求救于吳吳命  
鎮南節度使劉信率洪吉撫信步兵自瀏陽寇潭州武  
昌節度使李簡率水軍趣復州信等至潭州東境我師  
釋荆南引歸簡入復州執知州範唐

貞明六年冬十二月吳越王鏐為其子傳瑬一作瑒來求

昏許之

龍德元年夏五月丙戌朔梁改元秋七月命掌書記李  
峴馬匡送女于吳越是歲辰淑蠻入寇姚彥章討平之

龍德二年

闕

月始取永道郴諸州民丁錢絹米麥

李心

傳朝野雜記曰馬氏據湖南始取永道  
郴州桂陽軍茶陵縣民丁錢絹米麥

龍德三年夏四月己巳晉王存勗稱皇帝于魏州國號  
大唐改元同光冬十月朔日有食之唐主入大梁遂滅  
梁王遣子牙內馬步都指揮使希範入覲納洪鄂行營  
都統印上本道將吏籍唐主問洞庭廣狹希範對曰車

駕南巡財堪飲馬爾唐主大悅既而撫其背曰比聞湖南必為高郁所圖有子如此高郁何能可得邪郁故謀臣唐欲去我爪牙佯為流言以間之

三楚新錄曰馬市範入覲途經淮上

時秦維翰旅遊楚泗間知其來遽謂之曰僕聞楚之為國挾天子而令諸侯其勢不可謂之卑也加以利盡南海而公室大富足下之來非傾府庫之半則不足以供芻粟之費今僕貧者敢以萬金為請希範輕薄公子觀維翰形短而腰長語魯而且醜不覺為之絕倒既而贈與敬百緡維翰拂衣而去及希範立時維翰已為宰相奏削去半伏其事似未可信錄以備考是月復以桂州之歸化縣為純化

縣是歲避唐廟諱改岳州昌江縣曰平江



同光二年夏四月乙亥唐加王兼尚書令冬十月進羅  
浮柑子于唐又遣使賀唐主萬壽節進銀龍鳳陷花漆  
浴斛一事盤龍御衣龍鳳蹙金鞞腰龍鳳裝箭箠龍鳳  
朱背弓紅絲弦金鍍頭箭各一副白金一千鎰

同光三年冬十一月王聞蜀亡大懼表求致仕略曰臣  
已營衡簾之間爰為菟裘之地願歸印綬以保餘齡唐  
主璽書慰勞優詔不許是時王開市無征四方商旅聞  
風輻湊湖南地故產鉛鐵用都軍判官高郁策鑄鉛錢

以十當銅錢一

通鑑云湖南專用錫錢

已又鑄鐵錢圍六寸文曰

乾封泉寶用九文為貫以一當十

乾封錢其文自上而右而下而左獨泉字

作篆湖南故事曰馬殷置鐵冶鑄錢可六寸圍重非銖兩用九文為貫文曰乾封泉寶其文上乾其數上九遂通用焉洪氏泉志曰此錢徑寸七分重十七銖圍五寸半文曰乾封泉寶而湖南故事以為鐵錢豈當時鑄銅鐵二程邪流行境內商旅出境無所用錢輒易它貨去故能

以本土所餘之物易天下百貨國以富饒

十國紀年云馬殷始鑄鉛

錢行于城中城外即用銅錢賈人多銷鉛錢持過江北高郁請鑄鉛錢圍六寸文曰乾封泉寶以一當十錢既重厚市肆以券契借琛交易又湖南不事桑蠶郁勸王令輸稅者以

帛代錢由是機杼大盛

同光四年夏四月唐主嗣源立改元天成王遣使修貢并賀即位唐加王守尚書令

天成二年春正月癸丑朔唐主更名亶三月王會唐兵伐荆南遣都指揮使許德勲屯岳州夏五月丁卯唐賜王鞍馬玉帶命饋糧于行營王不即奉詔是月遣中軍使史光憲入貢于唐唐主賜王駿馬十美女二道過江陵南平王季興執光憲而奪其物六月王請建行臺丙

申唐封王為楚國王唐有司言無封國王禮請如三公

用竹冊

五代會要云先是天成年七月月中書門下奏湖南節度使馬殷封楚國王禮文不載國王之

制請約三公之儀用竹冊從之今取歐史及通鑑年月日秋八月唐冊禮使尚書右

丞李序至于潭州

序一作无序冊府元龜云李光序為散騎常侍從唐時與右拾遺曹琛往

湖南為殷冊命先是梁中使往如隣國禮或稱臣呼殷為殿下賓華皆有丞郎給舍之目光序等至客司先會謁殷之禮須遵梁朝舊事琛謂之曰豈有湖南一令公稱藩唐室復欲天使稱臣哉如不受唐冊命改國即任所為既見殷但呼公而已其餘序持節奏朝廷朱書御

學士舍人任呼為判官書記

札許自開國立臺承制置官屬分天子之半仗焉是月

王始開國以潭州為長沙府立宮殿置百官皆如天子制而微更其名翰林學士曰文苑學士知制誥曰知辭制樞密院曰左右機要司羣下稱之曰殿下令曰教以弟實為靜江軍節度使子希振武順軍節度使次子希聲武安軍節度副使判長沙府姚彥章為左丞相許德勲為右丞相李鐸為司徒崔穎為司空拓跋恒為僕射馬珙為尚書張瑤張迎判機要司潘起為吏部侍郎何致雍戶部侍郎黃損兵部侍郎凡管內官屬皆稱攝惟

朗桂節度使先除後請命是歲上三代尊謚曾祖筠曰  
文肅祖正曰莊穆父元豐曰景莊立三廟于長沙

天成三年春二月丁丑朔日有食之三月王如岳州遣

六軍使袁詮

歐陽史作詮  
今從通鑑

副使王環與子監軍希瞻將

兵擊荆南大破其軍于劉郎汭進逼江陵南平王季興  
請成以史光憲來歸王讓副使環不即取荆南環言宜  
存江陵以為扞蔽王悅是月大舉水軍擊漢圍封州為  
漢將蘓章所敗我師遁還夏四月吳右雄武軍使苗璘

靜江統軍王彥章寇岳州王命許德勲禦于君山丁亥  
敗吳兵于道人磯鹵璘及彥章以還五月吳遣使求和  
王歸璘彥章于吳六月唐詔王討荆南王遣許德勲攻  
之決勝副指揮使廖匡齊殺高從嗣于陳明日南平王  
季興請成秋九月荆南敗我兵于白田執我岳州刺史  
李廷規以獻吳冬十二月南平王季興薨吳以其子從  
誨為荆南節度使

天成四年春三月王命次子希聲知政事總錄內外諸

軍事先行後聞夏四月下教國內銅錢一直錫錢百丙午王環敗荆南兵于石首秋七月王子希聲矯王令殺其臣高郁八月唐主勅中書門下凡署將相勅牒宜落

吳越王鏐及王官位

五代會要云天咸四年八月初朝廷每有將相恩命往往例詣節

度使帶平章事兼侍中中書令並列銜于勅牒後例書使字今兩浙節度使錢鏐是元帥尚父興使相名殊承前列銜久未改正湖南節度使馬殷先兼中書令之時理宜齒于相位今守太師尚書令是南省官資不合列署勅尾今後每署將相牒物宜落

下錢鏐馬殷官位乃永為常式

長興元年冬十月王寢疾遣使詣唐請傳位于子希聲



唐疑王已歿辛亥命王子希聲為起復武安節度使兼

侍中十一月己巳王薨年七十九

九國志云殷以大中六年歲在壬申生享

年七十九蓋自大中壬申至長興元年庚寅實七十九年為得其實湖湘故事運歷圖亦云殷長興元年卒獨五代舊史云長興二年卒年七十八似誤

遺教諸子兄弟相繼寘劍于祠堂

曰違吾命者戮之諸將議遣兵守四境然後發喪兵部

侍郎黃損曰喪君有君何備之有宜遣使詣隣道告終

稱嗣禮也唐主詔曰馬殷官爵俱高無以為贈可謚曰

武穆明年十二月庚申葬于衡陽之上瀟

湖廣總志云馬殷墓在衡

陽上漢  
水側

論曰國家之興豈不藉有師武臣力哉武穆奮迹行伍之中龍驤前驅司馬推轂此固屬有天幸而瓊之驍悍郁之謀畫德勲以威斷稱彥暉以果毅著環則智深勇沉恒則慷慨切直皆一代將相才也攀鱗附翼共啓霸圖遂爾據湘潭跨桂嶺南抵柳連北震江漢假非渤海偏處于門戶彭城密邇于比隣偏方之大勢成矣柰何克家無人適符衆駒爭棧之言功臣冤死國亦隨衰垂

裕後昆武穆其有慚德焉

十國春秋卷六十七

十國春秋卷六十八

檢討吳任臣撰

楚二

衡陽王世家

衡陽王名希聲字若訥武穆王次子武穆王子數十人  
嫡子希振長而賢其次希聲與希範同日生希聲母曰  
袁德妃希範母曰陳夫人而德妃有美色希聲竟以母  
寵得立長興元年十一月丙戌襲位稱遺命去建國之

制復藩鎮之舊十二月唐進希聲為武安靜江等軍節度使加兼中書令希聲居喪無戚容常聞梁太祖嗜食雞肉私心慕之命庖人日烹五十雞以供膳二年冬武穆王將葬于衡陽且發引矣希聲不入泣頻食雞膾數器而起朝臣潘起譏之曰晉代阮籍居喪食蒸豚世故不乏賢者三年秋七月湖南大旱希聲命閉南嶽及境內諸神祠門竟不雨辛卯希聲薨追封衡陽王王性惡而好貨海商有鬻犀帶者直數百萬晝夜有光洞照一

室王殺商而取之逾月光遂滅

文昭王世家

文昭王名希範字寶規武穆王第四子也希範初為鎮南節度使希聲既歿六軍使袁詮潘約等迎希範于朗州而立之長興三年秋八月希範至長沙辛酉襲位九月唐以希範為武安軍節度使兼侍中冬十月癸酉進唐銀茶請頒戰馬唐明宗賜馬五十匹歸貢物四年春正月乙卯唐加希範為武安武平等軍節度觀察等使

檢校太尉兼中書令行潭州大都督府長史封扶風郡  
侯是年追怨衡陽王嗣位不讓幽其母弟希旺不得預  
兄弟之數應順元年春正月壬辰唐閔帝封希範為楚  
王夏四月唐潞王從珂廢其主從厚而自立

尋殺之

改元

清泰是歲唐正使兵部尚書李鐸副使馬承翰來聘

五代

史云鐸愍帝時奉使湖南聞廢帝立喜以為必用已為  
相還過荆南謂高從誨曰士固有否泰吾不為時用久  
矣今新天子即位我將用矣乃就從誨求寶貨入獻以  
為賀從誨與馬紅裝拂二課熊皮一因為鐸置酒問其  
副使馬承翰今朝廷之臣孰有公輔之望承翰曰尚書  
崔居儉左丞姚顗其次太常盧文紀也從誨笑取進奏



使報狀示鑄額與文紀皆科平章事  
矣鑄大衛還獻其皮拂殿帝終不用

清泰三年春三月王弟希杲鎮桂州有善政監軍裴仁  
煦言其收衆心王頗疑之夏四月漢將孫德威寇蒙桂  
二州王命弟武安節度副使希廣權知軍府事自將兵  
巡桂州漢兵自蒙州退走徙弟希杲知朗州秋七月庚  
寅王自桂州北還冬十一月契丹主立石敬瑭為大晉  
皇帝改元天福是時命修黃陵廟致祭

日涉編云每歲  
以六月六日致

祭

天福二年

闕

月王表聞壺關剖木六字實為大晉

開基之識先是梁開平中潞州軍前李思安奏壺關縣  
庶穰鄉人因伐樹分為兩片內有六字曰天十四載石  
進乃圖其狀以獻仍付史館及唐莊宗由晉王登位自  
謂應之至是石氏國號晉朝與木文允合因解釋以進

稽神錄云開平二年梁將李思安攻潞州營于壺口伐  
木為柵破一大木中隸書六字曰天十四載石進思  
安表上之梁臣皆賀以為十四年必有遠方入貢司天  
少監徐鴻獨謂所親曰自古無一字為年號者吾以為  
丙申之年當有石氏王此地昔移四字中兩豎書置天  
字左右即丙字七移四之外圍以十字貫之即申字也

後至丙申歲晉高祖以  
石姓起并州如鴻之言

夏五月晉勅青草湖廟安流侯

改封廣利公洞庭湖廟

關

改封靈濟公磊石廟昭

靈侯改封廣利威顯公黃陵二妃懿節廟改封烈廟從  
王奏也冬十二月晉詔加王江南諸道都統制置武平  
靜江等軍事改賜功臣號增食邑有差是歲置義寧鎮  
於靈川縣地尋改為義寧縣

天福三年冬十月順賢夫人彭氏薨夫人治家有法王  
甚憚之既歿後王始縱聲色為長夜之飲十二月乙酉

王貢晉御輦一乘金漆栢木鏤金花版銀裝真珠車渠  
紅絲網囊悉備又進謝恩除江南諸道都統絹二千疋  
又進謝改功臣加食邑銀鈔鑼四十面重二千兩土絹  
土絕吉貝布共三千疋麩金五十兩

天福四年夏四月晉加王天策上將軍賜印綬開府置  
官屬是月王奏改湘川縣為清湘縣

新舊唐書志但有  
湘源而無湘川然

歐陽史職方考云以湘川縣為清湘縣與地廣記云隋  
置湘源縣唐因之後改為湘川楚又改為清湘而置全

州五代會要則云以湘川縣  
置全州仍置清湘縣今從之仍置全州治清湘

湖廣志  
云僧全

真郴州人唐至德初來遊湘源朔淨土院宋州刺史章  
宙遣使禮請翌日即至四門各見其入及宙出道迎惟  
見一人而已其神通不可具述卒年一百三  
十二五代時因全真多神異改湘源為全州

并割灌陽

縣隸之秋八月黔南巡內溪州刺史彭仕然

通鑑作彭仕然

史作彭士然今按李弘昇銅柱銘作彭仕然弘昇乃希範學士當無謬誤從之

引錦溪州蠻萬

餘人寇辰澧二州焚掠鎮戍遣使乞師于蜀蜀主以道

遠不許九月辛未王命左靜江指揮使劉勅決勝指揮

使廖匡齊帥衡山兵五千討之

歐史云希範遣劉勅劉全明等以步卒擊士然

今從通鑑冬十一月王始開天策府置護軍中尉領軍司馬

等官以諸弟及將校克其職又倣唐太宗天策府文學

館立學士員以武安軍節度判官拓跋恒都統掌書記

李弘臯江南觀察判官廖匡圖昭順軍觀察判官徐仲

雅都統判官李鐸靜江府節度判官潘起

一作記

鎮南軍

節度掌書記衛曦

九國志作曹稅  
今從五代史補

鎮南軍節度判官李

莊昭順軍節度判官徐牧澧州觀察判官彭繼英

闕

裴頌桂管觀察推官何仲舉武安軍節度

巡官孟玄暉容管節度推官劉昭禹靜江府掌書記鄧

懿文武平軍節度掌書記李松年

九國志作李弘節  
今從五代史補

武

平軍節度推官蕭洙

一作洙

昭順軍觀察度支使彭繼勲

十八人為之是月劉勅等進攻溪州彭仕然兵敗弃州  
走保山寨石崖四絕勅為梯棧上圍之廖匡齊戰死十  
二月漢諫議大夫李紆來聘隨遣使報聘

天福五年春正月劉勅進攻彭仕然寨火箭焚之仕然  
帥麾下逃入溪錦深山乙未遣其子師曷帥諸蠻納溪  
錦獎三州印請降二月初班師還長沙王徙溪州于便

地表仕然為溪州刺史以勅為錦州刺史溪州西接牂  
牁兩林南通桂林象郡王素稱漢馬援苗裔效伏波將  
軍故事以銅五千斤鑄柱立之溪州柱高丈二尺八地  
六尺

名山記云銅柱在辰州府城西  
北一百一十里會溪城對江

命學士李弘皋銘

之勒誓狀於上自是寧州蠻莫彥殊以所部溫那等十  
八州都雲蠻尹懷昌率其昆明等十二部牂牁蠻張萬  
濬率其莫播等七州皆前後來附

郎縣釋名云天福五  
年羅甸王普露附楚

戊申王貢晉臥輦一乘御衣一襲鳳文韡龍文帶各一



具三月晉山南東道節度使安從進邀貢物于襄陽

天福六年秋八月甲寅貢晉金銀器及方物冬十月遣

使貢諸色香藥蠟面含膏茶于晉十一月晉安從進舉

兵反丁酉遣使貢晉吉貝等三千疋白蠟一萬斤朱砂

五百斤別進漆器萬餘事十二月晉以高行周知襄州

行府事詔王出師討襄州王遣天策都軍使張少敵以

舟兵趣漢陽仍漕米五萬斛以饋軍是歲蜀主賂七寶

鐘為王壽王以賜岳州君山寺

名山記曰岳州府君山有七寶鐘所鑄高六尺

廣二尺五寸蜀孟昶以此鍾

壽馬希範希範賜之寺中

天福七年夏五月遣使賀晉重午節貢白金茜緋簾扇等物夏六月晉主殂齊王重貴立冬十月王大興土木功建天策府于長沙城西北作天策光政等一十六樓天策勤政等五堂極棟宇之盛欄檻皆飾以金玉塗壁率用丹砂凡數十萬斤地衣春夏以角簾秋冬以木棉為之先是主者以丹砂非卒致之物有憂色未幾東境山崩涌丹砂如邱陵於是收用之頗足僚吏升殿者但

覺丹砂之氣藹然襲人是歲晉勅改道州延唐縣為延喜縣避高祖諱也

天福八年夏四月戊申朔日有食之

闕

月王置銀槍都

八千人楚地多產金銀茶穀比年財貨豐殖王奢欲無厭遂自誇大為長槍大槊塗以白金募富民年少者克之是歲作九龍殿刻沉香為八龍飾以金寶各長百尺抱柱相向作趨捧之勢已居其中自言身一龍也製襍頭脚長丈許以象龍角向晨將御殿先焚香龍腹中烟

氣鬱然而出若口吐焉又建會春園嘉宴堂金華殿其  
費鉅萬間攜子弟僚屬於會春園遊宴學士徐仲雅等  
賦詩上觴晝夜無節

湖湘故事曰馬氏作會春園開宴  
徐東野作詩有數聯當時所稱云

珠璣影冷偏粘草蘭麝香濃却損花  
山色遠堆羅黛雨草梢春夢麝香風  
衰蘭寂寞含愁綠小杏妖嬈弄色紅

用度不足因加賦國中王每遣使者行田以增頃畝為  
功民不勝租賦而逃王曰但令田在何憂無穀已而命  
營田使鄧懿文籍逃田募民耕菑民捨故從新僅能自  
存自西徂東各失其業又聽人入財拜官以財多少為

官高卑之差富商大賈布列在位外官遷者必責以貢  
獻為殿最民有罪富者輸財強者為兵受刑惟貧弱者  
而已又置函于府門使人投匿名書互相告訐復用孔  
目官周陟議令常稅外大縣貢米三千斛中縣千斛小  
縣七百斛無米者輸布帛以抵之天策學士拓拔恒切  
諫以為不可王大怒終身不復見恒

開運元年秋七月辛未朔晉大赦改元九月庚午朔日  
有食之

開運二年秋七月王殺其弟希杲冬十月遣使獻供御  
紬絹六千疋白羅一百疋筒卷白羅十疋錦綺褥面十  
牀錦綺背十合于晉十二月囚湘陰處士戴偃削天策  
副都軍使丁思瑾官偃以詩涉刺譏思瑾以上書切諫  
獲罪是時遣廖法正聘于唐及還語人曰東朝天子粹  
若珠玉南嶽真君恐未如也

開運三年春三月升桂州全義縣為潯州仍改全義縣  
為德昌縣并割桂州之靈川廣明義寧等三縣隸之從

王奏也

歐陽史職方考無有澤州此據五代會要所載當是歐陽史失記之

秋九月王知

晉主好侈靡屢以珍玩為獻求加都元帥甲辰晉詔王為諸道兵馬都元帥冬十二月契丹執晉主重貴以北是歲晉客省使王筠來聘以國亂未歸

開運四年春二月丁巳朔契丹主下制稱大遼會同十

年大赦遣使冊王為尚父

五代史稱云契丹開山湧升秋之事以為希範非常人遽

冊為尚父

王以契丹相推奉益自矜喜是月辛未劉知遠即

皇帝位更稱天福十二年

按是年六月知遠改國號為漢始以天福年號編諭藩鎮

六月以前中原隔絕使  
命未通猶稱開運年號

夏五月王命母弟武安節度副

使天策府都尉領鎮南節度使希廣判內外諸司事壬  
辰王薨年四十九謚曰文昭先是己丑王方置酒臨江  
觀競渡忽驚起曰高郁來王弟希廣曰郁死久矣大王  
勿妄言亟趣駕歸血自鼻端迸出彌留之際郁復晝見  
竟以是不起或言武穆王時王自洛京歸具述莊宗聞  
馬家社稷必為高郁所取之言于武穆王武穆王笑曰  
主上戰爭得天下全以機數馭人以郁資吾霸業必欲



間之使我國如梁罷王彥章兵權也今若去郁正墮穀  
中王不信退而從史衡陽王卒致之死故郁數為厲云  
王好學善詩頗優禮文士然性剛愎且奢靡而喜淫先  
王妾媵多加無禮又令尼僧潛搜士庶家女有容色者  
強委禽焉前後數百人猶有不足之色曰吾聞軒轅御  
五百女以升天吾其庶幾乎有商人妻美而艷輒殺其  
夫奪之妻誓不辱自經死初王命修長沙城開壕畢忽  
得一物長十餘丈狀若土山無頭尾手足自北出泳游

水上久之入南岸而沒或謂之土龍無何王遂歿而楚亦大亂

論曰文昭以穎敏之姿讀書禮士天策羣英幾於梁苑鄴下之選焉乃驕僭性生怙侈滅義肆情土木閼靡九龍抑何志之卑也馬子離羣禍有由始又寧竢閼墻爭國時哉悲夫

十國春秋卷六十八

十國春秋卷六十九

檢討吳任臣撰

楚三

廢王世家

廢王名希廣字德丕文昭王同母弟也

武穆王弟三十五子

性謹

順文昭王絕憐愛之文昭王生平惡拓跋恒切諫常令  
閹人止恒不得入謁及臥病始思恒召之屬以希廣文  
昭王既薨將佐未知所立都指揮使張少敵都押牙袁

友恭以武平節度使知永州事希萼於先王諸弟為最  
長宜嗣位而長直都指揮使劉彥瑫天策學士李弘皋  
鄧懿文小門使楊滌皆於希廣有恩欲立希廣拓跋恒  
亦數勸希廣以位奉希萼彥瑫等皆曰今日軍政在手  
天與不取使它人得之異日吾輩安所自容乎希廣不  
能自決彥瑫等遂稱遺命共奉希廣權軍府事時越文  
昭王薨之四日乙未也

十國紀年云希範得疾尋國官  
告以傳位希廣湖湘故事闕希

廣猶豫之間奉輔明日寒口勸上乃受位軍府排衙賀  
之以其事奏朝廷託以希範臨終之日遺言以付希廣

二說不同今從  
歐陽史及通鑑

夏六月晉主知遠改國號曰漢仍以天

福年號遣使告諭秋七月甲午漢主以希廣為天策上  
將軍武安軍節度使江南諸道都統兼中書令封楚王  
天福十二年冬十月王兄希萼自朗州來奔喪乙巳至  
趺石王用劉彥瑫言遣侍從都指揮使周廷誨將水軍  
迎希萼命將士釋甲而後入廷誨與張少敵白王曰王  
能與之則已不然宜早除之王泣曰吾兄也焉忍殺之  
分國而治可也乃止之于碧湘宮不聽入見厚賂以遺

之希萼憤然而去是冬遣晉客省使王筠還漢

乾祐元年春正月乙卯漢大赦改元己未漢主更名暈  
丁丑殂于萬壽殿二月辛巳周王承佑嗣皇帝位秋八  
月南漢主遣知制誥鍾允章來求昏王不許南漢主怒  
問允章馬公復能經畧南土乎對曰馬氏方內爭不暇  
安能害我南漢主曰希廣懦而吝嗇士卒忘戰日久正  
吾進取之秋也是月王兄希萼屢訴于漢請與王各修  
職貢以求封爵置郎稱藩王用歐弘練張仲荀謀厚賂

漢執政使竟拒其請九月漢諭王兄弟宜相式好并別  
賜王兄希萼詔書勸其輯睦冬十月丁酉王貢漢除夜  
遊春圖女俠畫障真珠枕及端午金銀雕牀物色十二  
月辛巳南漢西北面招討使吳懷恩寇賀州王遣決勝  
指揮使徐知新任廷暉將兵救之會南漢已拔賀州鑿  
大窰於城外覆以竹箔復自塹中穿穴達窰為機軸知  
新等至引兵攻城南漢兵自穴中發機我兵悉陷死者  
以千數知新等敗歸王怒斬之南漢兵復陷昭州癸未

王兄希萼獻漢銀器千五百兩漢主降詔慰諭曰所修  
職貢舊有規程念航深梯險之勞重違卿意在誘善勸  
忠之道本實朕心今後凡有進獻可與希廣商量庶叶  
雍和不爽體制希萼不能從

乾祐二年春正月戊戌將徐進敗蠻於風陽山斬首五千  
級夏五月太白晝見六月癸酉朔日有食之秋八月希  
萼悉調朗州丁壯為鄉兵號靜江軍造戰艦七百艘謀  
攻潭州王聞之曰朗州吾兄也不可與爭當以國讓之



劉彥瑫李弘皋固以為不可乃命岳州刺史王贇為都  
部署戰棹指揮使以彥瑫監其軍己丑大敗希萼于僕  
射洲獲其戰艦三百艘贇追希萼幾及之王遣使召之  
曰勿傷吾兄贇遂引兵還希萼自赤沙湖遁歸妻苑氏  
知希萼必罹禍赴井死秋九月王獻漢絹二萬疋白金  
一萬五千兩玳瑁寶裝龍鳳牀一具盤龍椅子蹋牀子  
各一合戲龍二銀食器六十八事真珠花銀果子共千  
兩冬十月漢加王太尉丁亥王弟靜江節度使希瞻卒

乾祐三年夏六月希萼誘辰澁州及梅山蠻以攻益陽  
蠻素聞長沙帑藏之富爭出兵赴敵王遣指揮使陳璠  
拒之戰于淹溪璠敗死秋八月戊戌希萼又以羣蠻破  
廸田殺我鎮將張延嗣王遣指揮使黃處超救之處超  
敗死復遣牙內指揮使崔洪璉率兵七千屯湘鄉王潭  
以遇諸蠻是月漢封蒙州城隍神為靈感王從王請也  
九月辛巳希萼請漢別置進奏務于京師漢上優詔不  
許又賜玉璽書解和勸以敦睦是月希萼以朝廷偏佑

于王大怒遣使稱藩于唐乞師來攻唐加希萼同平章  
事以鄂州今年之租稅賜焉又命楚州刺史何敬洙濟  
師助希萼冬十月丙午王告急于漢且言荆南嶺南江  
南連兵欲分湖南之地乞發兵屯澧州以扼江南荆南  
援朗之路丁未王以劉彥瑫為戰棹都指揮使朗州行  
營都統彥瑫入朗州境戰艦過則運竹斷其後會希萼  
遣朗兵及蠻兵六千戰艦百艘來戰于湄州彥瑫乘風  
縱火頃之回風反火彥瑫還走江路已斷士卒戰亡及

溺死者數千人

湖湘故事考瑒敗在九月十三日十國紀年載瑒敗于十月今從之

王

聞之涕泣不知所為王居恒罕頒賜至是大出金帛以  
邀士卒心或告天策左司馬王弟希崇流言惑衆反狀  
已明請殺之王不忍曰吾自害其弟何以見先王于地  
下馬軍指揮使張暉將兵自它道擊朗州至龍陽聞彥  
瑒敗退屯益陽希夢又遣指揮使朱進忠等急攻益陽  
暉給其衆曰我以麾下出賊後汝輩留城中待我相與  
合勢圖之既出遂自竹頭市逃歸長沙進忠知城中無

主急擊之士卒九千餘人皆死十一月甲子朔日有食之王遣僚屬孟駢說希萼還報曰大義絕矣非地下不相見也朱進忠請希萼自將兵取長沙辛未希萼留其

子光贊守朗州悉發境內之兵入寇

湖湘故事云希萼以十月二十一日

直往湖南十國紀年云十一月希萼發兵趣長沙今從之

自稱順天王

歐陽史云自號順天將軍

今從通鑑

王大懼乞師于漢漢議發兵來援以朱令溫為都

部署會內難作師不果出是時蠻兵圍玉潭朱進忠引兵助之崔洪璉敗歸長沙王潭遂陷希萼沂江而上攻

岳州刺史王賚堅城不戰希夢責賚有二心賚曰願君  
王入長沙不傷同氣臣其敢不盡節希夢引兵去辛卯  
經湘陰焚掠而過及至長沙希夢軍于湘西步兵洎蠻  
兵軍于嶽麓進忠自玉潭來會亦營于江西王遣劉彥  
瑫召水軍指揮使許可瓊帥戰艦五百艘屯城北津屬  
於南津以弟希崇為監軍又遣馬軍指揮使李彥溫將  
騎兵屯駝口扼湘陰路步軍指揮使韓禮將二十人屯  
楊柳橋扼柵路時強弩指揮使彭師高登城望水西軍

入白王請與許可瓊水陸夾擊之王許之而可瓊已陰  
送款希萼遂沮其計王未知可瓊心猶命諸將受其節  
度可瓊常閉壘不令士卒知朗軍進退間或詐稱巡江  
與希萼會水西約為內應久之潭州大雪盈四尺西軍  
苦不得戰王深信巫覡及沙門之語乃搏土為鬼神形  
於江上舉手以却朗兵又作大像于高樓手指水西怒  
目視之又命衆僧日夜誦佛經王自被緇衣膜拜念寶  
勝如來謂之禳灾甲辰朗州步軍指揮使何敬真以蠻

兵三千陳于楊柳橋

何敬真九國志湖湘故事俱作何景真

望見韓禮旌

旗紛錯曰彼衆已懼易破也時朗人雷暉衣潭卒之服

潛入禮寨手劍擊禮不中一軍驚擾敬真乘亂擊之我

軍大敗禮被創走至家卒于是朗兵水陸急攻長沙希

夢攻長樂門牙將吳宏楊滌戰于門中希夢少衄已而

可瓊舉全軍奔希夢宏滌聞之皆潰長沙遂陷王率夫

人與王子匿于祠堂朗兵及蠻兵大掠三日殺吏民焚

廬舍自武穆王父子所積寶貨盡入蠻落宮殿屋宇咸



為灰燼焉李彥溫進攻清泰門不克與劉彥瑫等將千  
餘人奉文昭王及王諸子趣袁州奔唐張暉降于希萼  
吳宏彭師高見希萼皆釋不殺希崇帥將吏詣希萼勸  
進乙巳希萼入府視事閉城分捕王及掌書記李弘皋  
弟弘節都軍判官唐昭胤與鄧懿文楊滌等盡獲之希  
萼詰王曰承父兄之業寧無長幼乎王曰將吏見推朝  
廷見命非予意也希萼惻然曰此鈍夫也豈能為惡徒  
為左右惑之爾命囚之明日齎食弘皋弘節昭胤滌斬

懿文于市已而顧其下曰吾欲活希廣何如皆不對朱  
進忠常為王所答對曰大王三年血戰始得長沙一國  
不容二主宅日必悔之戊申賜王死

三楚新錄云昇  
為希考繼之

杖

王夫人某氏死于市王臨刑猶誦佛書彭師曷葬之劉

陽門外

胡氏通鑑辨誤曰史略釋文云瀏陽縣名屬潭  
州余謂潭州固有瀏陽縣而瀏陽門則潭州城

門各自潭州城出瀏陽者謂之  
瀏陽門出醴陵者謂之醴陵門

先是潭州多夾道植槐

廢王時盡易以柳榦又居人向夜爭織草屨為業聲聞

內外童謡云湖南有長街栽柳不栽槐百姓任奔竄

芒織草屨識者以為長街者內外路也不栽槐者兄弟  
失孔懷也草屨者遠行所服百姓逋逃之義也其豫兆  
有如此

論曰諺有之當斷不斷反受其亂僕射洲之勝朗州幾  
不能支廢王則曰勿傷吾兄希崇貳于我僉云大義滅  
親廢王則曰吾害其弟何以見我先王慕宋襄之虛文  
釀袁譚之實禍君子謂其喪身滅國也宜哉

恭孝王世家

弟希宗

恭孝王

學海作  
後廢王

名希萼武穆王庶子也

第三子

剛狠無禮

而希萼同母弟希崇者性尤狡險廢王希廣既襲位時  
希崇為天策左司馬陰遺書希萼言劉彥瑫等違先王  
之命廢長立少以干大倫意欲有以激希萼也希萼果  
大怒興師爭國及長沙已陷希萼命內外巡檢侍衛指  
揮使劉賓禁止焚掠希崇復從史推戴希萼遂自稱天  
策上將軍武安武平靜江寧遠等軍節度使楚王以希  
崇為節度副使判軍府事湖南要職悉以朗人為之時

漢乾祐三年為唐保大八年十一月丁未也已又命子  
光贊為武平留後以何敬真為朗州牙內都指揮使將  
兵戍之復召拓跋恒欲用之恒稱疾不起是歲潭州置  
龍喜縣

保大九年春正月周主威即皇帝位改元廣順

帝夢奉  
唐正朔

稱保大年號

二月甲辰王遣掌書記劉光輔入貢于唐

唐餘  
紀傳

云正月帝夢遣使貢方物今從通鑑又  
光輔湖湘故事作光翰今從十國紀年

三月唐以王為

天策上將軍武安武平靜江寧遠等軍節度使兼中書

令封楚王以右僕射孫晟客省使姚鳳為冊禮使是月  
光輔至金陵唐主待之厚光輔密言湖南民疲主驕可  
攻也唐主乃以營屯都虞候邊鎬為信州刺史將兵屯  
袁州潛謀侵邊王既得志多思舊怨殺戮無度縱酒荒  
淫悉以軍府事委希崇希崇復多私曲刑政紊亂朗州  
舊將亦頗有離心又小門使謝彥顥三楚新錄作謝延  
津湖湘故事作謝  
彥欽十國紀年作  
謝彥顥今從之本王家僮也以首面得寵至與嬪御  
雜坐常肩隨希崇或拊其背希崇銜之故事府宴小門

使執鈇在門外王使彥顥與坐或列諸將上諸將皆不  
平王以府舍焚蕩命朗州靜江指揮使王逵副使周行  
逢帥朗兵治宮室勞苦而無犒賜壬申旦逵行逢帥其  
衆逃歸朗州時王醉未醒癸酉王始遣湖南指揮使唐  
師翥追之逵等伏兵縱擊師翥僅以身免逵等黜王子  
留後光贊奉王兄子光惠知州事尋立為節度使夏六  
月王逵等以光惠愚懦嗜酒推辰州刺史劉言權武平  
留後表求旌節于唐唐人未許亦稱藩于周秋九月王

疑許可瓊缺望出為蒙州刺史遣馬步都指揮使徐威

左右軍馬步使陳敬遷水軍都指揮使魯公綰

歐陽史作魯綰

牙內侍衛指揮使陸孟俊立柵以備朗兵不加存恤戊

寅王置酒端陽門威等不預希崇亦辭疾不至威等遂

作亂

十國紀年作丁丑湖湘故事在十九日其日戊寅也今從之

使人先齎蹕馬十

餘匹入府以壯士執過隨之突入其府劫庫兵縱橫擊

人王踰垣走威等執囚之復執謝彥顥剗頂及踵而死

立希崇為武安留後希崇遣彭師曷幽王于衡山縣劉



言聞希崇立遣兵趣潭州聲言討篡奪之罪壬午軍於益陽西希崇懼癸未發兵二千拒之又遣使于朗州請和約為鄰藩言幕僚李觀象說言曰希萼舊將佐猶在未可圖也不若檄希崇取其首湖南可兼有已言從之希崇畏言勢即斷都軍判官楊仲敏掌書記劉光輔牙內都指揮使魏師進都押牙黃勗等十餘人首遣前辰陽令李翊齎送朗州至則腐敗莫辨言與王逵皆佯言非仲敏等首級翊皇恐自殺希崇既襲位亦稍稍縱酒

荒淫國人不附丙戌衡山指揮使廖偃與彭師曷共立  
王為衡山王以縣為府斷江為柵編竹為戰艦王以師  
曷為武清軍節度使召募徒衆數日至萬餘人遣判官  
劉虛已求援于唐徐威等見希崇所為必無成又畏朗  
州衡山之逼欲殺希崇以自解希崇覺之大懼密遣客  
將范守牧表請兵于唐唐主命邊鎬自袁州將兵萬人  
趣長沙冬十月辛卯鎬引兵入醴陵癸巳希崇遣使犒  
軍壬寅遣天策學士拓跋恒奉牋詣鎬降癸卯希崇等

從鎬入城鎬舍于瀏陽門樓湖南將畢賀時湖南飢鎬  
大發倉粟賑之楚人穴悅癸丑唐武昌節度使劉仁賻  
取岳州撫納降附人忘其亡是月邊鎬趣希崇帥其族  
朝唐宗人聚族相泣欲重賂鎬乞留居長沙鎬微哂曰  
國家與公家世為仇敵殆六十年未敢有意窺公之國  
今公兄弟鬪鬩困窮自歸若復二三恐有不測之憂十  
一月辛酉盡遷文肅以下諸族及將佐千餘人于唐悲  
慟登舟送者皆號泣響振川谷初童謠云鞭打馬馬急

走至是遂駢卒未鎬遣先鋒指揮使李承戢將兵如衡  
山趣王入唐庚辰王與部下萬餘人自潭州東下十二  
月唐主以王為江南西道觀察使守中書令鎮洪州仍  
賜爵楚王以希崇為永泰軍節度使兼侍中鎮舒州仍  
居揚州十年冬十二月王入覲唐主唐主留之數年薨  
于金陵謚曰恭孝周世宗征淮南揚州陷詔撫安馬氏  
子孫已而唐復揚州希崇率其兄弟十七人奔于周拜  
右羽林統軍餘皆為大將軍及節度行軍司馬先是馬

氏富強雄于列國諸院公子長幼凡八百餘人咸以侈

靡為務時稱酒囊飯囊多非刺之

荆湘近事云周行逢常言馬氏諸子志縱

奢惜文武之道未常留意時人皆謂之酒囊飯袋

公子輩聞而不平有國師張

氏紹之曰彼所見非者恐國祚不永也以君昆弟之衆

使更迭而治亦足撫有八百年何憂何懼為乎時復有

鄧翁者聞而嘆曰文武之道未常介意而更納虛誕之

說以自安吾見其死溝壑有日矣及邊鎬師至犇散寒

餒而斃者過半焉楚自唐乾寧三年歲在丙辰武穆王

自立于湘南至唐保大九年辛亥而滅

中原為廣順元年九國志以乾

祐三年為辛亥非是

凡五十七年當武穆王入湖南掘地得石識

曰龍起頭猪掉尾世皆以為有先兆

青箱雜記云劉建峯定長沙遣馬殷


領衆浚城濠得石碣有古篆十八其文曰龍舉頭猴掉尾羊為兄猴作弟羊歸穴猴離次解者以殷乾寧三年丙辰歲代立乃龍舉頭也至乾佑辛亥歲國亡乃猴掉尾也殷子希範以己未歲生又以開運丁未歲薨乃羊歸穴也又子希崇壬申歲生

後為江南所得乃猴離次也

又民謠曰三羊五馬馬子

離羣羊子無舍識者謂湖南與淮南國祚實應之

十國春秋卷六十九



總校官庶吉士臣張能照

校對官檢討臣郭寅

謄錄監生臣劉書